

涵芬樓古今文鈔

呂景端
書藏

新刊
知不足齋
PDG

涵芬樓古今文鈔卷七十二目錄

碑誌類

墓誌銘二

故襄陽丞趙君墓誌銘 柳宗元

覃季子墓銘 柳宗元

唐丞相贈太師韓國公苗公墓誌銘 李華

唐故武昌軍節度使贈尚書右僕射河南元公墓誌銘 白居易

唐河南元府君夫人滎陽鄭氏墓誌銘 白居易

唐工部員外郎杜甫墓誌銘 元稹

唐吏部侍郎贈禮部尚書昌黎韓先生墓誌銘 皇甫湜

唐岐陽公主墓誌銘 杜牧

唐丞相故太子少師奇章郡開國公贈太尉牛公墓誌銘 杜牧

吳王李煜墓誌銘 徐鉉

穆夫人墓誌銘 柳開

徐文質墓誌銘 穆修

种世衡墓誌銘 范仲淹

范純佑墓誌銘 富弼

翰林侍讀學士右諫議大夫楊公墓誌銘 歐陽修

尚書兵部員外郎知制誥謝公墓誌銘 歐陽修

太子太師致仕杜祁公墓誌銘 歐陽修

端明殿學士蔡公墓誌銘 歐陽修

黃夢升墓誌銘 歐陽修

張子野墓誌銘 歐陽修

尹師魯墓誌銘 歐陽修

孫明復先生墓誌銘 歐陽修

太常博士尹君墓誌銘 歐陽修

湖州長史蘇君墓誌銘 歐陽修

大理寺丞狄君墓誌銘 歐陽修

蔡君山墓誌銘 歐陽修

集賢院學士劉公墓誌銘 歐陽修

翰林侍讀學士給事中梅公墓誌銘 歐陽修

尚書都官員外郎歐陽公墓誌銘 歐陽修

尚書職方郎中分司南京歐陽公墓誌銘 歐陽修

北海郡君王氏墓誌銘 歐陽修

資政殿學士尚書戶部侍郎簡肅薛公墓誌銘 歐陽修

石守道墓誌銘 歐陽修

蘇明允墓誌銘

歐陽修

梅聖俞墓誌銘

歐陽修

南陽縣君謝氏墓誌銘

歐陽修

張晦之墓誌銘

宋祁

呂獻可墓誌銘

司馬光

給事中孔公墓誌銘

王安石

太子太傅田公墓誌銘

王安石

荆湖北路轉運判官尙書屯田郎中劉君墓誌銘

王安石

泰州海陵縣主簿許君墓誌銘

王安石

建安章君墓誌銘

王安石

孔處士墓誌銘

王安石

臨川王君墓誌銘

王安石

兵部員外郎馬君墓誌銘 王安石

贈光祿少卿趙君墓誌銘 王安石

廣西轉運使蘇君墓誌銘 王安石

臨川吳子善墓誌銘 王安石

涵芬樓古今文鈔卷七十二

侯官吳曾祺纂錄

碑誌類

墓誌銘二

故襄陽承趙君墓誌銘

柳宗元

貞元十八年。月日。天水趙公矜。年四十二。客死於柳州。官爲斂葬於城北之野。元和十三年。孤來章始壯。自襄州徒行。求其葬不得。徵書而名其人皆死。無能知者。來章日哭於野。凡十九日。唯人事之窮。則庶於卜筮。五月甲辰。卜秦詡兆之。曰。金食其墨。而火以貴。其墓直丑。在道之右。南有貴神。冢土是守。乙巳於野。宜遇西人。深目而髯。其得實因。七日發之。乃覩其神。明日。求諸野。有叟荷杖而東者。問之曰。是故趙丞兒耶。吾爲曹信。是邇吾墓。噫。今則夷矣。直社之北。二百舉武。吾爲子蒞焉。辛亥。啟土。有木焉。發之。緋衣緞衾。凡自家之物皆在。州之人皆爲出涕。誠來章

之孝。神付是叟。以與龜偶。不然。其協焉如此哉。六月某日。就道。月日。葬於汝州龍城縣期城之原。夫人河南源氏。先沒而祔之。矜之父曰漸。南鄭尉。祖曰倩之。鄆州司馬。曾祖曰弘安。金紫光祿大夫。國子祭酒。始矜由明經。爲舞陽主簿。蔡帥反。犯難來歸。擢授襄城主簿。賜緋魚袋。後爲襄陽丞。其墓自曾祖以下。皆族以位。時宗元刺柳。用相其事。哀而旌之以銘。銘曰。嗚呼。正且甲寅。秦國水之曰金。訓也。挈之。信也。薤之。有朱具絨。神具列之。懇懇來章。神實恫汝。錫之老叟。告以兆語。靈其鼓舞。從而父祖。孝斯有終。宜福是與。百越蓁蓁。羈鬼相望。有子而孝。獨歸故鄉。涕盈其銘。旌爾勿忘。

覃季子墓銘

柳宗元

覃季子。其人生愛書。貧甚。尤介特。不苟受施。讀經傳言。其說數家。推太史公班固書。下到今。橫豎鉤貫。又且數十家。通爲書。號覃子史纂。又取醫老管莊子思晏孟下到今。其術自儒墨名法。至於狗彘草木。凡有益於世者。爲子纂。又百有若干家。

篤於聞。不以仕爲事。黜陟使取其書以氏名聞。除太子校書。某年月日。死永州祁陽縣某鄉。將死。歎曰。甯有聞而窮乎。將無聞而豐乎。甯介而躓乎。將溷而遂乎。葬其鄉後若干年。柳先生來永州。戚其文不大於世。求其墓。以石銘。銘曰。
困其獨。豐其辱。

唐丞相贈太師韓國公苗公墓誌銘 李 華

永泰元年四月戊子。唐舊相太保韓國公薨。天子輟朝。羣臣出次。五月壬午。贈太師。七月丙子。詔使中謁者莅祭。京兆少尹護喪。龍旗輜車。鹵簿哀導。加于一等。園塋封樹。碑版垂後。盛于當朝。葬我韓國公。夫人名本於宏才。非此運不揚元勳。出於忠烈萬死之中。登諸日月九天之上。乾坤閉而復闢。鈞軸折而再駕。故肅宗皇帝。於行在見公曰。欲求良弼。其在茲乎。公諱晉卿。字元輔。上黨壺關人。祖襲夔。贈太子太師。父殆庶。贈禮部尙書。公成童好學。弱冠工文。二登甲科。三入高等。始自郡邑臺省之任。終乎廊廟台輔之器。至於牧四郡。使四道。在人爲政之絕跡。於公

能事之常格。故不足敘。天寶之末。胡羯亂常。公身在陷穽。心圖遼廓。謁至尊於幕殿。議大計於轅門。天子壯之。拜爲左相。公于時與兵部尙書汾陽郡王。經略大業。翊贊中興。公撫於內。汾陽營於外。克二京。復九廟。尊先帝。返上皇。公之功也。乾元二年。元兇授首。陳希烈等四十八人。議在殊死。公抗疏上論。以四方猶虞。罪當寬宥。三司質定。其事不行。於戲。慶緒之誅也。不用公議。使有思明之難。朝議之滅。復行公計。果令天下大安。仁人之言。不可已已。上元二年。玄宗升遐。詔公攝政。肅宗違代。令公當國。道合君臣。時契雲龍於二主。功高宇宙。德鍾社稷於一身。夫平計之。勃安之。總有平勃之勳。伊攝之。霍立之。再當伊霍之任。人臣貴極。今古罕儔。公晚嬰衰疾。屬辭樞務。遂得特紆聖眷。俯降臣禮。赤墀之下。杖策來朝。宣室之中。肩輿入見。此則明主上德而屈體。忠臣感恩而忘形。君臣之間。斯爲盛矣。無何有詔。冊授太保。軍國大務。仍咨訪焉。公至和爲心。太素爲體。以虛舟應物。世累不能干其神。以公器濟時。江海不能開其慮。故軒裳鍾鼎。於我如浮雲。大位遐年。在生爲

逆旅享年七十有七。歷任二十有四。順如也。夫人韓國夫人博陵崔氏。詩書之門。金玉其度。先公而歿。今則祔焉。嗣子發丕。堅榮垂向。呂稷望咸等。並強學懿文。保家繼代。忠足以勵行。孝足以揚名。敘德立銘。願昭先烈。掌文之客。敢忘大猷。其詞曰。有唐宗臣。爲國元老。清明淳粹。全德體道。磊落臣節。深沈廟謨。智能逃難。忠則忘軀。幽薊弄兵。咸秦振蕩。舉族南棄。拔身北嚮。一見先皇。其言甚壯。指麾籌畫。爰立作相。天地反正。蒼生之望。伊昔南狩。衣冠下從。三司獻議。萬乘將同。諫書一出。天下稱公。二聖登遐。萬方是荷。聖皇在闇。務輟宸坐。稱政臨朝。非公不可。彼蒼不仁。殲我鼎臣。天歸說夢。嶽降申神。嵯峨碑版。突兀封樹。嗚呼相國。韓公之墓。

唐故武昌軍節度使贈尙書右僕射河南元公墓誌銘

白居易

公諱楨。字微之。河南人。六代祖巖。隋兵部尙書封平昌公。五代祖弘。隋北平太守。高祖義端。魏州刺史。曾祖延景。岐州參軍。祖悱。南頓縣丞。贈兵部員外郎。考諱寬。比部郎中。舒王府長史。贈尙書右僕射。妣滎陽鄭氏。追封陳留郡太夫人。公卽僕

射府君之第四子。後魏昭成皇帝十五代孫也。公受天地粹靈。生而岐然。孩而嶷然。九歲能屬文。十五明經及第。二十四試判入四等。署祕書省校書郎。二十八應制策。入三等。拜左拾遺。卽日獻教本書。數月間。上封事六七。憲宗召對。言及時政。執政者疑忌。出公爲河南尉。丁陳留太夫人憂。哀毀過禮。杖而能起。服除之明日。授監察御史。使于蜀。按任敬仲獄。得情。又劾奏東川帥違詔條過籍稅。又奏平塗山甫等八十八家冤事。名動三川。三川人慕之。其後多以公姓字名其子。朝廷病東諸侯不奉法。東御史府不治事。命公分臺而董之。時有河南尉離局從軍職。尹不能止。監察御史死。其柩乘傳入郵。郵吏不敢詰。內園司械。繫人踰年。臺府不得知。飛龍使匿趙氏亡命奴爲養子。主不敢言。浙右帥封杖決安吉令至死。子不敢愬。凡此數十事。或奏或劾或移。歲餘皆舉正之。內外權寵臣無奈何。咸不快意。會河南尹有不如法事。公引故事奏而攝之甚急。先是不快者乘其便。相噪嗽。坐公專逞作威。黜爲江陵士曹掾。居四年。徙通州司馬。又四年。移虢州長史。長慶初。穆

宗嗣位。舊聞公名。以膳部員外郎徵用。既至。轉祠部郎中。賜緋魚袋。知制誥。制誥王言也。近代相沿。多失於巧俗。自公下筆。一變至於雅。三變至於典謨。時謂得人。上嘉之。數召與語。知其有輔弼才。擢授中書舍人。賜紫金魚袋。翰林學士承旨。尋拜工部侍郎。旋守本官。同中書門下平章事。公既得位。方將行己志。答君知。無何。有儉人以飛語搆同位。詔下按驗。無狀。上知其誣。全大體。與同位兩罷之。出爲同州刺史。始至。急吏緩民。省事節用。歲收羨財千萬。以補亡戶逋租。其餘因弊制事。贍上利下者甚多。二年。改御史大夫。浙東觀察使。將去同。同之耆幼鰥獨泣戀。如別慈父母。遮道不可通。送詔使導呵。麾鞭有見血者。路闢而後得行。先是。明州歲進海物。其淡蚶非禮之味。尤速壞。課其程。日馳數百里。公至越。未下車。輒奏罷。自越抵京師。郵夫獲息肩者萬計。道路歌舞之。明年。辨沃瘠。察貧富。均勞逸。以定稅籍。越人便之。無流庸。無逋賦。又明年。命吏課七郡人。冬築陂塘。春貯雨水。夏溉旱苗。農人賴之。無凶年。無餓殍。在越八載。政成課高。上知之。就加禮部尙書。降璽書。

慰諭。以示旌寵。又以尙書左丞徵還。旋改戶部尙書。鄂岳節度使。在鄂三載。其政如越。大和五年七月二十二日。遇暴疾。一日薨于位。春秋五十三。上聞之。軫悼。不視朝。贈尙書右僕射。加賻贈焉。前夫人京兆韋氏。懿淑有聞。無祿早世。生一女曰保子。適校書郎韋絢。今夫人河東裴氏。賢明知禮。有輔佐君子之勞。封河東郡君。生三女。曰小迎。未笄。道衛道扶。齟齬。一子曰道護。三歲。仲兄司農少卿積姪御史臺主簿某等。銜哀襄事。裴夫人韋氏長女。洎諸孤幼等。號護廕嬰。以六年七月十二日。附葬於咸陽縣奉賢鄉洪瀆原。從先宅兆也。公著文一百卷。題爲元氏長慶集。又集古今刑政之書三百卷。名類集。並行於代。公凡爲文。無不臻極。尤工詩。在翰林時。穆宗前後索詩數百篇。命左右諷詠。宮中呼爲元才子。自六宮兩都八方。至南蠻東夷國。皆寫傳之。每一章一句出。無脛而走。疾於珠玉。又觀其述作。編纂之旨。豈止於文章刀筆哉。實有心在於安人治國。致君堯舜。致身伊臯耳。抑天不與邪。將人不幸邪。予嘗悲公。始以直躬律人。勤而行之。則坎壈而不偶。謫瘴鄉凡

十年髮班白而來歸。次以權道濟世。變而通之。又齟齬而不安。居相位僅三月。席不暖而罷去。通介進退。卒不獲心。是以法理之用。止於舉一職。不布於庶官。仁義之澤。止於惠一方。不周於四海。故公之心不足也。逢時與不逢時同。得位與不得位同。富貴與浮雲同。何者。時行而道未行。身遇而心不遇也。執友居易。獨知其心。以泣濡翰。直書銘于墓曰。

嗚呼。微之年過知命。不謂之夭。位兼將相。不謂之少。然未康吾民。未盡吾道。在公之心。則爲不了。嗟乎惜哉。道廣而俗隘。時矣夫。心長而運短。命矣夫。嗚呼微之。已矣夫。

唐河南元府君夫人滎陽鄭氏墓誌銘

白居易

有唐元和元年九月十六日。故中散大夫尚書比部郎中舒王府長史河南元府君諱寬。夫人滎陽縣太君鄭氏。年六十。寢疾歿于萬年縣靖安里私第。越明年二月十五日。權祔于咸陽縣奉賢鄉洪瀆原。從先姑之塋也。夫人曾祖諱遠思。官至

鄭州刺史。贈太常卿。王父諱瞿。朝散大夫。易州司馬。父諱濟。睦州刺史。夫人卽睦州次女也。其出范陽盧氏。外祖諱平子。京兆府涇陽令。夫人有四子二女。長曰沂。蔡州汝陽縣尉。次曰柅。京兆府萬年縣尉。次曰積。同州韓城縣尉。次曰稹。河南府河南縣尉。長女適吳郡陸翰。翰爲監察御史。次女爲比丘尼。名眞一。二女不幸。皆先夫人歿。府君之爲比部也。夫人始封滎陽縣君。從夫貴也。稹之爲拾遺也。夫人進封滎陽縣太君。從子貴也。天下有五甲姓。滎陽鄭氏居其一。鄭之勲德官爵。有國史在。鄭之源派婚媾。有家牒在。比部府君世祿官政文行。有故京兆尹鄭雲逵之誌在。今所敘者。但書夫人之事而已。初夫人爲女時。事父母以孝聞。友兄姊睦。弟妹以悌聞。發自生知。不由師訓。其淑性有如此者。夫人爲婦時。元氏世食貧。然以豐絜家祀。傳爲詒燕之訓。夫人每及時祭。則終夜不寐。煎和滌濯。必躬親之。雖隆暑沍寒之時。而服勤親饋。面無怠色。其誠敬有如此者。元氏鄭氏皆大族。合而姻表滋多。凡中外吉凶之禮有疑。議者皆質於夫人。夫人從而酌之。靡不中禮。其

明達有如此者。夫人爲母時。府君旣歿。積與積方齟齬。家貧無師以授業。夫人親執詩書。誨而不倦。四五年間。二子皆以通經入仕。積旣第判入等。授祕書省校書郎。屬今天子始踐阼。策三科以拔天下賢俊。中第者凡十八人。而積冠其首焉。由校書郎拜左拾遺。不數月。讜言直聲。動于朝廷。以是出爲河南尉。長女旣適陸氏。陸氏有舅姑姻族。於是以順奉上。以惠逮下。二紀而歿。婦道不衰。內外六姻。仰爲儀範。非夫人恂恂孜孜善誘所至。則曷能使子達於邦。女宜其家哉。其教誨有如此者。旣而諸子雖迭仕。祿賜甚薄。每至月給食。時給衣。皆始自孤弱者。次及疎賤者。由是衣無常主。廚無異膳。親者悅。疎者來。故傭保乳母之類。有凍餒垂白不忍去元氏之門者。而況臧獲輩乎。其仁愛有如此者。自夫人母其家。殆二十五年。專用訓誡。除去鞭扑。常以正顏色。訓諸女諸婦。諸女諸婦。其心戰兢。如履于冰。常以正詞氣。誡諸子諸孫。諸子諸孫。其心愧恥。若撻于市。由是納下於少過。致家於大和。婢僕終歲不聞忿爭。童孺成人。不識撻楚。閨門之內。熙熙然如太古時人也。其